

**UCAPAN PERDANA MENTERI DI MAJLIS JAMUAN
TAHUNAN PERSATUAN PERKHIDMATAN TADBIR
DAN DIPLOMATIK (PTD) DI HOTEL HILTON, KUALA
LUMPUR, PADA 9 JUN, 1979.**

Yang Berusaha Dr. Elyas bin Omar, Yang Di Pertua Persatuan Perkhidmatan Tadbir dan Diplomatik dan Puan Fauziah, Yang Berbahagia Ketua Setiausaha Negara Tan Sri Abdullah Ayub, Yang Berbahagia Ketua Pengarah Perkhidmatan Awam Tan Sri Hashim Aman, Ketua-ketua Setiausaha dan Ketua-ketua Pengarah, Ahli-ahli Jawatankuasa Penganjur, Tuan-tuan dan puan-puan sekalian.

Majlis jamuan tahunan PTD ini membawa kenangan manis kepada saya. Ia mengingatkan saya kepada kejayaan cemerlang Barisan Nasional dalam Pilihanraya Negeri Kelantan tahun lalu. Pada malam ini pula, di samping dapat menikmati makanan yang lazat-lazat serta beramah mesra dengan pegawai-pegawai PTD, saya juga telah diberi penghormatan merasmikan Penubuhan Tabung Kebajikan PTD.

Saya dan isteri saya mengucapkan terima kasih serta penghargaan kepada Persatuan Perkhidmatan Tadbir dan Diplomatik, istimewa kepada Yang Di Pertuanya kerana sudi menjemput kami berdua ke majlis jamuan pada malam ini. Jamuan ini memberi peluang sekali lagi kepada saya bertemu muka serta beramah mesra dengan pegawai-pegawai PTD dari semua peringkat. Pada hemat saya bagi suatu perkhidmatan yang anggotanya telah meningkat kepada seramai lebih dua ribu orang, majlis seperti ini tentulah amat berfaedah. Ia memberi peluang kepada para ahlinya bergaul mesra dan menyambung tali persaudaraan di antara satu sama lain, iaitu suatu perkara yang sukar dilakukan dalam keadaan bekerja hari-hari. Saya mengucapkan tahniah kepada Persatuan PTD di atas usahanya memupuk semangat 'esprit de corps' dan rasa berkeupayaan di kalangan ahli-ahlinya.

Di majlis ini pada tahun yang lalu, saya telah menyentuh tentang peranan Perkhidmatan Tadbir dan Diplomatik dalam pentadbiran dan pembangunan negara serta harapan tinggi rakyat dan Kerajaan terhadap keupayaan perkhidmatan yang penting ini.

Tuan-tuan dan puan-puan sekalian,

Kita sekarang berada di ambang tahun lapan puluhan. Kita telah

menjayakan pelaksanaan Rancangan Malaysia Kedua yang berasaskan Dasar Ekonomi Baru. Rancangan Malaysia Ketiga yang merupakan lanjutan usaha-usaha bagi mencapai matlamat Dasar Ekonomi Baru telahpun siap dikaji semula dan ditambahkan peruntukannya. Pelaksanaan Dasar Ekonomi Baru untuk jangkaan masa dua puluh tahun akan sampai ke peringkat separuh penggal pertama pada akhir tahun depan. Penggal keduanya akan bermula dari awal tahun-tahun lapan puluhan.

Memang banyak kemajuan yang telah dicapai. Tetapi masih banyak juga lagi yang perlu dilakukan bagi memenuhi keperluan rakyat yang semakin meningkat. Keperluan dan tuntutan rakyat kepada Kerajaan yang mereka telah pilih akan menjadi lebih mendesak memandangkan kesedaran dan harapan tinggi mereka terhadap kemampuan dan keupayaan Kerajaan Berjiwa Rakyat. Kita bolehlah menjangkakan bahawa cabaran-cabaran dari masalah-masalah ini akan timbul, akibat kematangan dan kewarasan pemikiran rakyat jelata yang inginkan kemajuan dan hidup mewah.

Semakin banyak kita mencapai kemajuan, harapan rakyat untuk mencapai taraf kemajuan akan meningkat lebih tinggi lagi. Oleh yang demikian desakan ke atas Kerajaan akan bertambah. Untuk memenuhi tuntutan-tuntutan rakyat itu adalah perlu bagi perkhidmatan awam "to have a greater sense of urgency". Dalam melaksanakan rancangan-rancangannya, perkhidmatan awam hendaklah bertindak dengan secara coordinated. Sebarang tindakan yang tidak diselaraskan akan mengendalakan projek-projek. Bagi menjamin supaya pelaksanaan projek-projek berjalan dengan licin setiap pegawai mestilah faham objektif yang dituju dan hendaklah menunaikannya dengan penuh perasaan tanggungjawab.

Pada hemat saya penyelarasan adalah satu perkara yang perlu diberi pertimbangan yang serius. Inilah satu lapangan yang sentiasa menjadi punca kelambatan melaksanakan projek-projek. Walaubagaimana ber-sungguh-sungguh kita berusaha jika sekiranya kordinasi kurang dititik-beratkan maka projek yang dikendalikan oleh kita tidak akan siap dalam tempoh yang dijadualkan. Ini adalah satu kelemahan yang terdapat dalam sistem pentadbiran kita yang mesti dibaiki. Saya sedar bukanlah mudah untuk mencapai matlamat ini. Walau bagaimanapun, memandangkan perlunya penyelarasan dalam menjayakan projek kita mestilah menumpukan segala tenaga untuk mengatasi masalah ini. Bagi projek-projek besar, satu pendekatan yang menyeluruh atau 'integrated approach' adalah amat penting.

Adalah nyata bahawa keadaan ekonomi negara kita telah berubah. Dari sebuah negara yang hanya menghasilkan bahan-bahan mentah untuk dihantar ke luar negeri, Malaysia sekarang ini telah menjadi sebuah negara perindustrian. Rakyat negara ini juga beransur-ansur memainkan peranan utama dalam perdagangan bahan-bahan itu. PTD adalah terlibat secara langsung dan tidak langsung dalam perubahan ini. Pegawai-pegawai PTD adalah ditugaskan mengurus agensi-agensi yang menjalankan kegiatan perdagangan dan perusahaan. Oleh yang demikian pegawai-pegawai PTD hendaklah dilengkapi dengan kepakaran dalam bidang-bidang ini. Pegawai-pegawai PTD juga terlibat dengan cara tidak langsung dalam lapangan ini sebagai pegawai-pegawai Kerajaan yang dipertanggungjawabkan bagi mencadangkan kepada Kerajaan dasar-dasar dan tindakan untuk menggalak, mengawasi dan mewujudkan suasana yang sesuai bagi perkembangan perdagangan dan perindustrian. Tanpa pengetahuan dan kepakaran dalam bidang perdagangan dan perindustrian kemampuan pihak PTD dalam menjalankan tugas ini tentulah menjadi terhad.

Kerajaan telah dapat mewujudkan kepimpinan yang teguh bagi membimbing sektor swasta ke arah kemajuan yang lebih tinggi. Kejayaan Kerajaan adalah terbukti dengan pembangunan yang pesat yang dapat dilihat bukan sahaja di Kuala Lumpur ini bahkan di ceruk-rantau tanah-air kita. Pembangunan dan perkembangan dalam lapangan perdagangan dan perindustrian pada tahun-tahun hadapan akan memerlukan lebih banyak penglibatan dari pegawai-pegawai Kerajaan. Oleh yang demikian maka pegawai-pegawai PTD hendaklah melengkapi diri untuk memainkan peranan itu. Jika tidak, perkembangan perindustrian negara ini akan terbantut.

Dalam bidang antarabangsa, kita dapati bahawa Kerajaan semakin banyak terlibat dalam rundingan-rundingan penting seperti Susunan Ekonomi Baru Antarabangsa, Sistem Kewangan Antarabangsa, Common Fund dan sebagainya. Memandang kepada keadaan ini adalah perlu bagi pegawai-pegawai Kerajaan melengkapi diri mereka dengan pengetahuan dan kemahiran khusus supaya mereka dapat menunaikan tanggungjawab dalam lapangan ini. Perkembangan di dalam negeri dan dalam lapangan antarabangsa dalam perkara ini telah mendorong Kerajaan meningkatkan lagi kebolehan dan keupayaan perkhidmatan awam, khususnya PTD. Dalam konteks ini Kerajaan telah mengambil beberapa tindakan untuk meninggikan mutu perkhidmatan awam. Satu daripada tindakan ini ialah mengadakan peperiksaan pemilihan. Dengan cara ini maka dapatlah calon-calon yang terbaik sahaja dipilih untuk berkhidmat dalam PTD. Untuk memberi kesan yang lebih, kita perlu

juga mengkaji kemungkinan diadakan ujian bakat (aptitude test) supaya pegawai-pegawai yang dilantik kepada PTD bukan sahaja mempunyai pengetahuan yang lengkap tetapi juga mempunyai bakat (aptitude) yang sesuai.

Sebagai satu usaha meningkatkan lagi mutu kecekapan perkhidmatan awam, Kerajaan menyediakan kemudahan-kemudahan latihan seperti yang terdapat di Institut Tadbiran Awam Negara (INTAN). Selain dari itu pegawai-pegawai juga diberi peluang untuk melanjutkan pelajaran ikhtisas mereka di universiti-universiti tempatan dan lain-lain pusat latihan di luar negeri. Di sini saya suka menegaskan bahawa kemahiran dan pengetahuan sahaja belum dapat menjamin mutu perkhidmatan seseorang pegawai. Sikap terhadap tugas-tugasnya juga sama penting dan tiap-tiap pegawai yang ingin maju mestilah mempunyai minat dan kecenderungan yang kuat serta semangat penuh dedikasi. Usaha-usaha mestilah dijalankan bagi memupuk sikap yang penting ini. Program-program latihan hendaklah mengandungi cara-cara dan teknik-teknik baru bagi memupuk sikap yang penting ini. Usaha memupuk sikap dan semangat ini tidak terhad kepada pusat-pusat latihan tetapi boleh diselenggarakan dengan cara lain melalui seminar-seminar dan perjumpaan. Inilah satu lapangan di mana Persatuan PTD dapat memainkan peranan yang akan memberi kesan tidak ternilai bagi meningkatkan mutu perkhidmatan.

Proses kenaikan pangkat juga sedang diperbaiki. Bagi kenaikan pangkat ke tingkatan-tingkatan yang tertentu, peperiksaan dan temu duga diadakan. Dengan adanya sistem baru ini adalah diharapkan bahawa pegawai-pegawai yang benar-benar berkelayakan dan cepak akan dinaikkan pangkat. Dalam perkara ini saya suka mencadangkan supaya sistem baru ini digunakan untuk mengkaji kecenderungan dan minat seseorang pegawai. Ini patut diberi pertimbangan supaya seseorang pegawai itu ditempatkan dalam jawatan yang secukupnya dengan kebolehan dan peribadinya.

Rakyat mengharapkan pegawai-pegawai yang benar-benar dapat menyumbangkan segala kepakaran yang mereka perolehi daya pemikiran dan daya usaha mereka untuk mengatasi masalah-masalah yang dihadapi oleh rakyat. Setiap pegawai mestilah memupuk sifat-sifat kejujuran yang berasaskan nilai-nilai luhur dan keugamaan yang bersemadi di dalam jiwa pegawai itu. PTD sebagai sebuah perkhidmatan yang ulung dan tertua, haruslah berusaha menggalakkan atau memupuk pertumbuhan nilai-nilai itu. Kebolehan dan keupayaan PTD meng-

hadapi cabaran dan dugaan ini bergantung kepada kesanggupan pegawai-pegawai mengemaskinikan kepakaran.

Tuan-tuan dan puan-puan sekalian,

Sebelum menyampaikan beberapa rangkap pantun sebagai menjawab pantun-pantun yang telah dijual oleh Presiden Persatuan PTD, saya sekali lagi mengucapkan terima kasih dan penghargaan kepada ahli-ahli Persatuan PTD yang hadir kerana memberi penghormatan kepada kami berdua. Sekarang, inilah rangkapan pantun-pantun saya:

Hang Jebat Hang Kesturi

Panglima hebat bekerja tekun
Majlis pantun menjadi tradisi
Bilangan meningkat setiap tahun.

Buah berembang buah pedada
Dibawa Dang Nila sama hidangan
Dulu Hang Li Po pakai perada
Kini jaminan meningkat perdagangan.

Kalau ada denak yang pandai
Burung tekukur senang dipikat
Bila PTD kerjanya selesai
Barulah saya boleh berihat.

Bukit Goh dan Bukit Ibam
Kelapa sawitnya banyak minyak
Pemain-pemain golf kalau nak faham
Handicap dan problem saya sama banyak.

PTD penting dalam perkhidmatan
Pegawainya orang bijak bistari
Soal jempunan usah dirisaukan
Kan masanya panjang lagi!

Tuan-tuan dan puan-puan sekalian,

Dengan ini saya dengan amat sukacitanya, mengisytiharkan penubuhan Tabung Kebajikan PTD.

Terima kasih.